

fmoit.gov.ba > Vjesti

SVJETSKI DAN PTICA SELICA

Objavljeno: 09.05.2016

SVJETSKI DAN PTICA SELICA

“Zaustavimo ilegalno ubijanje i trgovinu pticama selicama “



Dan ptica selica obilježava se svakog drugog vikenda u maju/svibnju u svrhu podizanja svijesti javnosti o potrebi zaštite ptica selica i njihovih staništa. Inicijativa za obilježavanje ovog dana pokrenuta je pod pokroviteljstvom međunarodnog Sporazuma o zaštiti afričko-euroazijskih migratornih ptica močvarica i Konvencije o zaštiti migratornih vrsta divljih životinja. Obilježavanjem Svjetskog dana ptica selica skreće se pažnja na ptice selice koje su najugroženije, jer se susreću sa opasnostima cijelom dužinom svojih selidbenih putova.

Iako ptice selice imaju ključnu ulogu u održavanju ekosistema, veliki broj ptica se gubi svake godine, kao rezultat ilegalnog ubijanja, hvatanja i trgovine. Milioni ptica se ubijaju svake godine. Zbog navedenog i usljed gubitaka staništa i klimatskih promjena, mnogim vrstama ptica prijeti opasnost od izumiranja.

Bez obzira što su vlade širom svijeta potpisale međunarodne ugovore i donijele zakone koji reguliraju, i u nekim slučajevima, zabranjuju iskorištavanje ptica selica, zakone je neophodno poštivati i provoditi. U suprotnom, ovako dragocjen resurs, kao dio naše prirodne baštine, mogao bi zauvijek biti izgubljen. Poduzimajući akcije za očuvanje biološke raznolikosti i održivo korištenje prirodnih resursa putem integriranja vrijednosti biološke raznolikosti u procese prostornog planiranja i planove i programe u sektoru poljoprivrede, ribarstva, šumarstva, turizma i drugim sektorima, što je u skladu i sa zahtjevima Konvencije o biološkoj raznolikosti, može biti vrlo korisno za migratorne vrste ptica.

Sukladno navedenom, veliki broj Aichi ciljeva sadržanih u Strateškom planu za zaštitu biodiverziteta za period 2011 – 2020. su od velike važnosti za migratorne vrste. Zemlje članice Konvencije o biološkoj raznolikosti su potaknute da uključe akcije za očuvanje migratornih vrsta ptica u svoje nacionalne strategije i akcione planove za zaštitu biološke raznolikosti kako bi se uklonili nedostaci u zaštiti i upravljanju kritičnim područjima i staništima za ptice selice duž svih selidbenih putova, kao i da poduzmu hitne mjere kako bi se spriječilo ilegalno ubijanje, neodrživi lov, hvatanje i trovanje migratornih vrsta ptica, te spriječilo izumiranje poznatih ugroženih vrsta i unaprijedio njihov status zaštite. Ilegalne aktivnosti ne utiču samo na populacije ptica, već također, negativno utiču na naše društvo u cjelini i naše postojanje, kao i na naše prirodne resurse.

Ptice selice ne poznaju granice, kao ni napore koji se na međunarodnom nivou poduzimaju da se obezbjedi da svako može uživati i imati korist od njihovog stalnog prisustva. Svi smo svjesni da nam kontinuirana zaštita migratornih vrsta može pružiti samo koristi. Na primjer, mjere prilagodbe koje pomažu održavanju i unapređenju kvaliteta močvarnih ekosistema za migratorne vrste ptica, također, imaju direktnu korist za zajednice koje ovise o močvarnim ekosistemima i njihovim uslugama, kao što su voda i hrana, te smanjenje rizika od katastrofa.

Tokom godine, ptice selice prelaze ogromne udaljenosti na svojim seobenim rutama, dugim i nekoliko hiljada kilometara. Zaštitom ovih ptica i njihovog okoliša, pomažemo u osiguranju opstanka njihovih staništa i očuvanju biološke raznolikosti općenito.

Novosti

- > [Vijesti](#)
- > [Priopćenja](#)
- > [Iz medija](#)
- > [Javne rasprave](#)
- > [Događanja](#)
- > [DNA](#)
- > [VODE](#)